

四庫全書

集部

欽定四庫全書

集部

滄溟集卷四

詳校官庶吉士<sub>臣</sub>柳邁祖

中書<sub>臣</sub>劉源溥覆勘

覆校官中書<sub>臣</sub>朱鈐

校對官庶吉士<sub>臣</sub>嚴福

謄錄監生<sub>臣</sub>劉文耀

欽定四庫全書

滄溟集卷三

明 李攀龍 撰

五言古詩

錄別 十二首

悠悠念往路離別從此長何以酬明德攜手歸故鄉良  
時不須更且復各盈觴仰視日月馳千載互相望浮雲  
難獨留游子暮彷徨綢繆踰皓首風波忽一方

其二

千秋一嘉遇此別安可知良時不努力賤軀欲何為晨  
風野蕭條浮雲西北馳河梁臨往路遠望令人悲游子  
自有懷悠悠當告誰

其三

長思何益會久留何益歸行人悵明發褰裳路徘徊嘉  
期能再至安辭渴與饑浮雲一相失千里常依依我欲  
往從之送子東南飛

其四

秋蘭懷芬芳依依樹前庭春華不再盛枝葉皆已零念  
昔二三子俛仰如流星羽翼一以乖邈若隔平生徘徊  
顧四海誰能喻中情結交各有時千載一濯纓離別不  
在遠日月從此征長當為路人獨無弟與兄尊酒可自  
慰願言崇令名

其五

乖疑起恩愛離別生歡娛念子非一身中懷難久俱握  
手一相失奄忽秦與胡新知自言樂山海日以殊行路

方未央出門思故廬浮雲沒景光北風悲有餘  
褰裳復四顧徘徊當路衢結髮在戰場皓首為征夫

其六

四海一黃鵠千里命其傳悲風厲胡馬躑躅鳴相求  
何況袍友從此遠行游離別無慷慨去去且復留  
白日沒邊城回首望中州浮雲西北飛河漢東南流  
視夜常苦早寒冬正悠悠明月燭羅幃嚴霜切綢繆  
俛仰已自喻誰能不懷憂

其七

念當首往路千里邈已臨絲竹發高堂聽我雙龍吟  
泠江漢流浮雲寒以陰長風激羽翼嚴霜摧北林慷慨  
有餘悲新聲愴人心游子失相視征夫淚不任中曲一  
俛仰從此無知音故鄉一尊酒願言常酌斟徘徊戀景  
光忽為辰與參來者自非昔去者自非今

其八

高樓耿長夜攬衣歌且謠秋風一何悲游子不得驕明

月照空牀羅幃自蕭蕭三星既隅列河漢東南朝黃鵠  
正徘徊翩翩顧其曹故鄉邈千里慷慨命同袍浮雲日  
西北安知心所勞携手在須臾經時復漂搖

其九

河漢何皎皎衆星錯其間攬衣立前庭明月照苦顏悲  
風中夜起蕭蕭有餘寒涕淚應聲零四顧慘無歡往路  
信可懷為樂及盛年游子不自愛故鄉豈難旋

其十



黃鵠難為羣  
游子常苦辛  
念當從此別  
中懷日以新  
清光皎明月  
遠望不可親  
高樓正蕭條  
徘徊四無人  
上有千里雲  
其下起飈塵  
各言還故鄉  
握手道何因

其十一

窮冬盛陰氣  
白日西南微  
征人常早寐  
皎月照我扉  
故鄉千餘里  
中夜起懷歸  
千星駕言邁  
嚴霜裂裳衣  
獨行無儔匹  
誰知渴與饑  
穹廬多悲風  
蕭蕭遶草衰  
身在天一隅  
何得不徘徊

其十二

顏色無常好春華一以零悲風蔽地來四顧何冥冥寤  
言懷往路攬衣從此興殺氣拳毛髮涕泣斷為冰仰視  
河漢星離如水中萍景光不戀人遊子豈遑寧夜依牛  
羊宿日驅駕馬行努力及明時安能愛其情

錄別 又十一首

秋風既蕭蕭浮雲亦依依四顧但他鄉游子一何微駕  
言西北邁中道正裴徊客行無好懷萬事不如歸

其二

三星跂相視新月拳素光兩宮高自出雙闕遙相望雲霞絢河漢機杼成文章羅幃彩四座華燭搖中堂主人前進酒彈瑟為清商流焱激長夜殺氣隕嚴霜蕭蕭墮白髮翩翩曳衣裳男兒不憔悴誰知在他鄉

其三

北風著枯林浮雲苦多陰紅顏日就衰他鄉日就深別離起中夜對酒不能斟絲竹含妙伎佳人懷好音眴眴

適君意慷慨動君心罷曲一俛仰變為游子吟念當事  
行役淚下難自禁

其四

秋風西北來蕭蕭動百草蕩子無室家悠悠在長道紅  
顏能幾時棄捐一何早對客發素書零涕復盈抱上言  
故鄉好下言故人老

其五

冉冉年欲度秋蘭采間萎蕩滌千歲情結束欲何為美

酒不誤人紅顏多所宜萬事自明日行樂此一時四座  
慘無言游子中心知浮雲動悠悠故鄉難可期

其六

悲風墮白日天地何冥冥招搖彈北戶河漢條中庭征  
夫苦難夜且復命新聲芳言動君子四座無不清人生  
即滿百長此千載名豈如飲美酒趙女奏鳴箏慷慨盡  
逸響慰我饑渴情惟念當離別翩翩渺獨征

其七

明月促曙光衆星西北移游子工早行起問夜何其攬  
衣出門去長當渴與饑蒺藜穿我履嚴霜薄我肌別離  
矜盛年老至不自知努力事戰場淚下復無時

其八

浮雲滿天地蕩子欲安之努力事行役棄置以為期少  
年盛意氣慷慨生別離萑萑無根蓬翩翩中林騅馬上  
不得語涕淚各纍纍君但重自愛遠道歸有時

其九

秋風動千里遊子何翩翩早行多所懷慷慨私自憐嚴  
霜覆四野明星出高天涕淚一以下中道忽言旋踟蹰  
戀徒侶不知身棄捐客從遠方來遺我繒綵牋故人俱  
白頭安得獨盛年

其十

昭昭秋素景明月涵金華清酒照朱顏中堂發高歌游  
子在外單結交常苦多別離動白頭人生復幾何悲風  
搖枯林嚴霜攜女蘿新知雖云樂不如早還家

其十一

高樓出浮雲零露綴綺疏  
明月照佳人清光相有餘  
紛何下涕淚纖纖結素書  
願持千里心託此雙鯉魚  
尊名不可處白髮難久居  
豈如及盛年駕言歸故廬

錄別 又三首

眇眇遠行客綿綿思故鄉  
悲風繞車鳴浮雲立馬傍  
邊城苦多陰秋氣激繁霜  
白日匿何時四野一茫茫  
落木委空庭游響拂閒房  
霏霏羅帷影明月在我牀  
起視河



漢流寥寥夜未央出亦以徘徊入亦以彷徨

其二

大江多悲風秋日澄清陰浮雲無本根天路難重尋故人一失所結交良苦心游子易慷慨撫劍吐哀吟白髮行蕭蕭繁霜悴我衿登城望四野明月照北林悠悠委他鄉中懷安可任

其三

去日苦太易游子無常家別離在俯仰素雪以朱華驅

車就顧景明發泛黃河浮雲騰余征流颺激其波顧眄  
當中原慷慨為悲歌千里一蕭條故鄉復如何

古意

七首

秋風西北起吹我游子裳浮雲從何來安知非故鄉蕭  
蕭胡馬鳴翩翩下枯桑暮色入中原飛蓬轉戰場往路  
不可懷行役自悲傷

其二

新人一何好年頗十五餘本自貴家子秦氏有名姝故

人行采桑值我城南隅顏色各精妙手爪亦相如故人  
工紉素新人工笙竽笙竽未詎央紉素色已渝人生無  
新故夫壻自言殊

其三

嶮陰有孤竹常含千歲霜截為雄鳴管其音中清商豈  
不在人耳世已無鳳皇新聲自一時艷曲亂高倡安得  
日相御並坐君子堂

其四

十五漳河女出身邯鄲庭絲竹妙一世纖手何泠泠清  
商有餘悲慷慨為新聲中曲若無人含意已獨明知音  
難再遇紅妝日夜零奮響發浮雲摧耳不能聽

其五

英英天上雲不照濁水泥新婚日以親賤妾日以攜繁  
聲出皓齒妙舞生春姿縞綦難為容棄如秋草姜念當  
羽翼乖依依即路岐良人無古歡妾自中心知

其六

中天起雙闕浮雲出兩宮馳道挺其間甲第羅西東胡  
姬正當壚邀客過新豐朱脣含綠酒纖爪扣青銅墮髻  
似無意紹統一何工眄眄正愁人流紈動春風雙雙羽  
林郎翩翩五色驄挾瑟上高樓調絲方未終

其七

胡鷹一何勁北風一何高朔方士馬地斗酒命同袍窮  
冬感四野大獵出臨洮盪石響深谷烈火走平臯邊聲  
中夜起殺氣常蕭蕭積陰生戰場白日慘不消草枯牛

羊瘦雪盛孤鼠驕引領望交河層冰正迢迢

詠古十六首

帝作大唐歌八伯奏卿雲鐘石興麓野人聲一以論日  
月發光華爛然星具陳沈璧十二渚岱宗乃于禋是時  
闢四門穆穆咸所賓

其二

綏綏塗山狐九尾不自多我往求平定念子無室家明  
發興嶽庭乃身參洪波宗䟽事則哀祝融揚英華玉牒

沐日月素書出江河

其三

江水一何沛薄大趣歸處朝周過故墟宮室生禾黍傷  
彼西山士採薇自相茹千載睹逸詩斯人乃高舉

其四

白雲出山陵乃在天一方東土既已洽徂西聊倘佯虎  
豹自為羣鳥鵲列成行惟帝立嘉命諸夏發其祥願言  
顧見女中心以翱翔刊石樹弁茲千載遙相望

其五

杲杲熾日羽施施掩飏旂我車既已寫四馬亦孔柔射  
夫率原隰君子循方舟楊柳橐其鮮鹿豕填相求多士  
自允異燕樂成王猷駕言徂東郊出洛朝諸侯

其六

白石粲南山蘋鯉麗滄浪單衣裁及胥緼縷遠從商夜  
中起飯牛任車自所將爝火辟列星上客爛生光疾歌  
一不聞何謂伯與王



其七

苑彼中林鳥拚飛不集枯齒牙一為猾公子良見圖矯  
矯上天龍霧雨既已敷子推獨耆乾草莽空號呼懸書  
下宮門綿山聊與娛

其八

莊王構曾臺乃與雲夢隣東延洞庭石涔陽激清津趙  
魏方幸禍況此狼虎秦諫者七十二枕藉以前陳時非  
一耕夫三楚訖無人因知沮溺流用即社稷臣

其九

駕言九臯澤攬彼漸水臺  
果愚蔽荆岑絕流曲池隈  
婉彼三楚士諫獵紆其才  
大雨忽盈河疾風西北來  
洪潦起滔天隕雹激以雷  
商梁正綏立僕夫行告哀  
孤虛無妄設熒惑諒為災  
帝德睠荒淫欲去此徘徊

其十

文駟陳大庭膳肉宿所脩  
羣婢一以盛君子乃見咻  
孰謂彼婦口於中可優游  
蟪蛄遂盈耳鳳兮當何求  
斧柯

不在手龜山鬱綢繆翱翔七十國交轍奸諸侯狄水衍  
其波罔濟非無舟駕言從吾好還轅息我陬

其十一

忽忽歲已莫太臺役方作太上美遨遊禾黍未能穫滯  
穗滿甫田風雨殫零落相國一沾襟罷酒不為樂

其十二

貪吏常苦富廉吏常苦貧不見孫叔敖其子行負薪五  
霸相代興主烈難為臣令名有遺封餘財喜沒人寢丘

雖言惡千載功無湮

其十三

闔閭為無道厥欲如蛇豕薦食視上國乃政從楚起昭  
王在草澤羣臣不復紀使者哭秦庭七日未得理入郢  
既已甚丘隴行見簫感茲告急言誓彼同袍士賢臣亦  
多術存亡尤獨美

其十四

吳王既棲越出遊包山湖道逢一丈人邀我洞庭隅靈

墟發深藏中有神禹書大文祕天地乃傳百六初金簡  
歟浮雲玉宇回璇樞科斗不可辨鳥跡互盤紆精華一  
以洩厭氣直國廬顧見二室顛三石方扶疏

其十五

薛公得馮驩門下知者誰十日居傳舍乃問客所為先  
生惟一劒彈鋏何其悲授室締高國驅車出中逵主人  
意已厭同列寧見推田文既失位傾身與持危片言悟  
齊主復相名益垂竒士多侮世藏用匪可窺

其十六

中春陽和起嘉觀臨四方刻石頌功德從臣紀攸長上  
以獻泰成下威六暴彊郡縣乃作始經緯不踰行薦號  
立大義昭設咸有章濯俗諒已美刑名非恒常鞭箠出  
頑夫二世尋滅亡

雜興 十首

伯牙負高操引曲輒入神從師蹈東海延頸四無人洪  
波盪大壑悲鳥方號群白日坐失色山林忽不分精氣

一以變此調得其真世俗蔽聞見千載遞相因遺世伎  
始妙絕絃多苦辛自非鍾子期古道難具陳

其二

離朱不逆景師曠不逆風所用一以失化為瞽與聾轡  
策出大御繩墨出巧工顧眄即千里結構臨層穹束手  
寧自甘狗人道乃窮

其三

良材出大國群構集明堂構櫨相支持榱桷碩且長飛

棟鬱雲興高軒間重梁衆人稱壯麗輸子起彷徨柱小  
亦已撓朽蠹處中央迨天方晦陰室家羅四廂行者苦  
無休居者歌慨慷風雨一漂搖不知僵路傍

其四

良馬躋路岐善言躋嫌疑稱樂自云早日月寢已馳黃  
金不可作美酒多所宜清風響高唱令德含妙辭

其五

太元秉經緯天地自生成陰陽遞消息四時相虛盈雷



雨鼓神氣日月宣華英網緼交二儀周流列五行至和  
液甘露盛德厭欒槍唐虞且法象明良熙穆清垂衣御  
三事大治無常名

其六

翩何漢宮女紅妝鬱熒熒本自良家子十五克後庭是  
時得上意寵至身逾輕貴幸霸天下妙麗傾人城詔許  
領椒房嬪御無不驚脣如蠶丹飴齒如鏘玉聲一當萬  
乘主常含中道情絕色動千載旦夕誰見明美惡懸盛

衰棄置視合并所以尹婕妤顧盼失平生

其七

詭時苦難遇直道苦不華挈鉗羸衆口繩墨矯群邪所  
以上古人工拙無常家陸沈金馬門醉即據地歌世久  
自相玩為德一何多在羣既累生孤貴亦失和首陽與  
柳下一龍復一蛇同流雖所願跡邇心則遐

其八

鴻鵠一以舉四海何悠悠局促人間世豈若遠行遊明

時不重至中懷難久留遇合成倭倖美女多所仇英雄  
既失據片語解綢繆所以孔仲尼舍車即于浮

其九

洞庭大張樂千乘朝昆侖在昔有行幸軒穆一何尊樓  
船下河東羽衛覽西垠風起白雲飛隴首望中原簫鼓  
發哀情長馳晻回轅入齧妃女脣出接詞客言

其十

名馬不受羈足下有千里黃鵠不受羅羽翼就四海貴

賤自一身出處無二軌時利適愚夫勢衰蹶智士祛長  
不握臂屨縮不截趾陸沈人間世悠悠日復爾

雜興 又十一首

鴻鵠摩蒼天萬里一翱翔迴颺生羽翼浮雲為低昂畢  
連城上烏黃口自成行俛啄仰相嚇徘徊腐鼠傍

其二

大魚鼓長鬚捷若舉帆幢夜驅蒼梧風凌晨浮九江怒  
擊胥山濤洪波為洶洶奔圖運南溟中更不相容何言

一失水湖海難再逢寧如涸轍鮒斗水得所鍾

其三

江南有佳人桃李翦朱顏  
宕子行從軍間房重其關  
明月一徘徊形影自翩翩  
秋氣響羅帷蕭蕭難獨眠

其四

鳳樓十圍幹龍翔九回流  
圓景朝列宿五嶽尊陵丘  
聖人膺大命多士自相求  
稷契功不刊唐虞德無儔  
神明盛驅使衣裳美優游  
詩書監二代孔氏乃宗周  
在昔紆

天經羣后有綢繆艱難戴王室千載成咸休

其五

長離自鳳雛天馬乃龍子文采成九苞骨法本千里箕  
穎出高人巖穴有知己抗迹唐虞庭清風振薄鄙

其六

南山有奇鳥朝陽曜其文下來蘭池飲羅網正紛負雖  
復就長纓徘徊懷不羣枳棘無安步哀鳴激清雲

其七

翩翩西北風蕭蕭枯桑林登高使人望秋氣悲我心叢  
臺蔓寒草易水清且深當時燕趙士慷慨有遺音

其八

駕出薊北門東望元英宮高臺造浮雲碣石來悲風客  
卿既裂地戰士亦論功稱系遷大呂昭王氣何雄汶篁  
一不植千里生飛蓬

其九

逍遙臨蓬池言陟梁王臺還顧望大河洪波渺悠哉飛

雪蔽中原北風千里來馳驅名利途無駿不駑駘精衛  
自微鳥東海生塵埃

其十

古今一旦暮俯仰成興衰不見桑榆雲千里相蔽虧黃  
金苦易盡紅顏安可為如何膏粱士拂拭使人悲

其十一

萬事無不有何言能自持巢由平世度高行衆人疑俯  
仰在當路得喪未可期湯火煎太和傾側使神危終身



繫羅網失勢還相欺念我平生歡臨觴命妖姬

古詩後十九首

并引

前有十九首故後言之猶稱古者其文則十九首也其文則十九首而以屬辭辟之制轡筴于埳中恣意于馬使不得旁出而居然有一息千里之勢斯王良造父所為難爾

其一

行行萬里餘依依夢故鄉見君累長夜攜手立彷徨寤

言心尚爾忽在天一方越鳥東南飛胡馬鳴相望眊眊人自好棄捐人自老徘徊亦何益努力苦不早思君度餐飯歲月漫浩浩慷慨即別離故鄉勿復道

其二

摇摇車馬客依依燕趙女沾沾倚箏立交交夾窓語盤盤高結出飈飈巾帶舉浮雲忽自歸蕩子漫無所天寒錦衾薄空牀難獨處

其三

白石何歷歷松柏何離離人生天地間一日不可知斗  
酒無常置良會無常期沈吟厚與薄為樂無乃遲宛洛  
美游戲冠帶自相隨宮闕起雲中第宅羅四垂王侯負  
貴氣佳客以盛衰君但視車馬攬策振其綏

其四

良會屬今日彈箏倚新聲唱苦令神傷三變不可盈中  
曲忽自置躑躅一再行欲因更促柱難為聽者情人生  
局一世悠悠終何成要路多坎坷先秋慘其榮來者率

如此焉知千歲名

其五

三五樓上女徒倚當雙扉紅妝妙一世誰不攬容輝絃歌入青雲新聲亮所稀千載為一彈含意有餘哀知音難再得且復立徘徊終日不成曲零涕沾裳衣三歎令人老游子何時歸

其六

燭燭芙蓉花擢擢采蘭婦懷袖忽已盈馨香誰為有秋

草一以萎此物難獨久馳情一水間無因攜素手

其七

搖光加孟冬北風何慘慄寒至踈衆星蟾兔亦早缺四  
時既潛移遺迹獨難列不知空牀下蟋蟀安從出宛洛  
多故人厚者如膠漆及其據要路負我道非一織女無  
成章牽牛策不發且復守貧賤振翮各有日

其八

浮雲何冉冉亦在南山阿千里遠徘徊游子苦無家昔

我同門友策馬驅高車兩宮屬眄睐冠帶日逶迤致身  
及盛時結附一何多極宴累長夜重闌發絃歌白露忽  
以零迫此蕙蘭花芳草隨飈塵誰能顧女蘿

其九

獨鵲西北逝逸響一何哀念當生別離欲去復徘徊不  
惜寒氣厲但傷羽翼摧我有鴛鴦綺無衣誰為裁

其十

眄眄織女星當機理紈素牽牛能幾許常為投杼誤紈

素欲遺誰終日西北顧負輓復何時軒車歲云暮攬衣  
即河漢躑躅不得度

其十一

高樓出西北下有故鄉道浮雲蔽天起回飈響秋草四  
時更相至人生自著老傷彼遊子顏戚戚難獨好攜手  
不須更棄捐一何早努力以為樂泣涕復盈抱

其十二

東城屬浮雲阿閣百餘尺歲暮多悲風游子衣裳薄四

野何蕭條所遇但遺跡來者自為今去者自為昔盛年  
奄已哀含意將安適燕趙出名倡紅顏照宛洛結束隨  
時變絃歌日相索未彈理懷袖若在遠行客弄指一何  
妙列柱一何迫馳情視雙燕飛入王侯宅

其十三

磊磊丘與墳鬱鬱郭北地白日松柏陰悲風四面至誰  
能黃泉下永含未伸意悠悠即長夜千載一以棄漫漫  
待明發迢迢正遙寐身世非膠漆豈得常相寄此物無



賢愚萬歲更相致神仙不可知服食苦中置美酒與佳人攜手行遊戲

其十四

郭北一極望徘徊安所如新墳歷歷出古墓附里閭薪者躑躅歌棄女迴其車白楊日夜疎蕭蕭悲有餘三歲去故鄉一字無素書

其十五

處世苦無見孤生非所憂高言唱同心千載一相求窮

賤解膠漆棄置衰交游昔我同門友上書哀王侯明月  
皎夜光躑躅不得投

其十六

迢迢月既望白露被庭中越女理前音燕服羅清宮交  
游自遠方文彩復無雙駕言出廣陵將以適曲江聊慄  
此何氣攬觀不可窮帷車蔽日下萬馬悲回風水力率  
已至神物難為容秉意屬南山浩蕩惟所從上客變其  
度陳唱誰與同極命以成章娛樂良未終

其十七

孟冬風已厲攬衣有餘歎獨宿知夜長遠客知天寒河  
漢直雙闕皎若素與紈黃鵠從西南孤飛正漫漫一鳴  
緩中帶再鳴霑玉顏遊子不可聽令君中道還所以生  
別離慷慨亮為難

其十八

客從洛浦至遺我合歡衾中有長相思緣以結同心芙  
蓉發文彩鴛鴦屬哀吟遊子正無衣天氣復已陰故人

此屬意徘徊獨至今

其十九

皎皎羅帷月攬之有餘輝寤言守長夜依依未能歸故鄉無不可道路亦何為客行各有懷誰知我心悲出門一以望浩蕩霑裳衣

君子行

君子美百行維日服厥秉車奔不易度火滅不改容垢言一生口盟漱難為工金多徒自穢重名撓直躬幸勿

少須臾無替功乃崇九淵可浮游所患溺愚蒙

遠遊篇

乘蹻萬里外言造太微庭雲霞曜朱闕日月夾丹楹羣  
后儼金止仙女紛玉亭隨風列以雨出窈而入冥沆瀣  
飛素液芝草不復零虹霓為我帶雜佩搖華星濯纓河  
漢流清波正泠泠俯視世間人汎汎如浮萍

太山篇

大東有神嶽專名為岱宗日精攝海氣吳野控其峯明

堂朝列后金策紀元功維昔七十家軒轅此登封雲霞  
自窈窕石室何青蔥仙人攬玉樹鬚髮生清風靈液飛  
潺湲芝草如蒿蓬唯帝擁靈符千載一升中願言與問  
道乘龍舉太空

滄溟集卷三

欽定四庫全書

滄溟集卷四

明 李攀龍 撰

五言古詩

建安體

三首

轉蓬遇回風千里一遨遊  
良時不自愛汎汎亦何求  
西來既迂怪周孔以墳丘  
患無紛葩名年往非所憂  
烈士多壯心對酒苦難酬  
枕石太華顛俯漱江海流

其二

北風正徘徊繁霜以霏霏經過至朔方惆悵我武威白  
骨何籍籍鎧甲貫瘡痍猛獸蹲高岡狐兔失故蹊伐薪  
缺斧斨飲冰膠馬蹄遠行多苦寒中路渴與饑是時一  
介志悠悠誰當知

其三

河漢懸清光三五正參差西北起浮雲霏霏風入帷白  
髮一何早隱約當待誰快獨飲美酒登臺臨華池趙女  
蕩奇舞秦箏繁且悲憂來亦有方安得常相隨



代建安從軍公燕詩并引

魏三祖及子建諸子間各臨戎義有紀列久  
當逸失不獨王仲宣五篇又公燕一章應阮  
侵不就次與仲宣從軍詩過意諷婉均之未  
盡所長今各代作二首云

代文帝

長驅下廣陵觀兵東南疆方舟被大海萬騎紛縱橫旌  
旗隨波靡組練遠茫茫中流震金鼓士馬何激揚鎧甲

生悲風千里一鏘鏘白羽所漂搖浮雲自低昂撫劍登高城我軍正相望零雨有遺篇咏言難可忘

代明帝

太常摩回颺旗幟何翩翩屯吹彌故壘列舟竟長川登檣望四野蕭條無人煙高墉走狐兔荆棘動參天撫劍下中流甲士羅東西賦詩寫其懷隨波以潺湲從軍在萬里惆悵私其憐

代曹子建

丈夫志萬里慷慨事四方我后振威靈六軍乃激揚分  
旗建東嶽耀武臨江湘鳴鏑控流颺利劒捷秋霜長驅  
下淮泗人馬自生光戈矛何參差方舟正縱橫何言為  
國讐一舉披舊疆解徒旆言入歌舞旋許昌離宮大饗  
士勞賜以次行君子念在御賦詩垂華芳

代王仲宣

方舟何翩翩素波亦蕭蕭薰葭澹餘映長檣激流颺撫  
劒登高防人馬且逍遙空城何所有殺氣蔽旌旄日夕

見煙火四野飛蓬蒿邊聲起大江誰知我心勞從軍殊  
復樂菲薄愧鉛刀

代陳孔璋

浮雲肅四野流飈殷悲音邊地一何苦慷慨難為心飲  
馬長城下水寒窟且深白骨撐路出殺氣駕重陰將建  
大舉功干戈日相尋騁哉書檄馳縱橫正如林身在記  
室中慙慙匪自今男兒念鐘鼎誰能常滯淫

代徐偉長

自我出從軍涉旬東南行文學託後乘顧瞻亦已深中  
流萬艘集陶陶層波生淒風旗幟繁秋日戈甲精沈陰  
結戰氣唯聞金鼓聲壯士何飛揚各顧一先鳴志已馳  
九關豈但懷不庭雖君在只尺搔首未遑寧

代劉公幹

我后赫斯怒整駕東南征六軍如飛集列植龍陂城皚  
皚霜風至肅肅戈甲鳴長飈轉沙礫仰視白日冥流波  
一何勁金鼓悲且清連鳶下青雲毛血灑隰垆發機入

微妙觀者無不驚壯士以慷慨各奮先登情釋此薦嘉  
客濡翰叙平生篇章信綺麗新詩雅以精小臣在綬幕  
起坐懷同聲戎事諒非難但恐沈痼嬰

代應德璉

鬱鬱西北雲千里驅重陰臨江大耀士方舟載浮沈連  
波響風雨長縹紛悲吟分曹命超距逸氣不可禁君子  
在行伍常懷饑渴心非不愧細微良遇日以深故山何  
時旋徘徊中自任

代阮元瑜

高城苦多陰，秋日殊復悲。  
邊聲薄暮起，但見浮雲飛。  
霜氣勁且繁，河漢寒無暉。  
三星何躑躅，皎月正徘徊。  
流飈西北至，征馬鳴相依。  
自知從君樂，誰能常不歸。

公燕詩

文帝

置酒高臺觀逍遙，芙蓉池兄弟夜行游。  
貴客鬱參差，明月照長筵。  
羅纓何霏霏，翩彼衆君子。  
展詩奏新辭，絃歌

入微妙慷慨使心悲流塵蕩清響綺麗有餘姿吐握苦  
不悉人生安可為在昔無樂方彼此同一時

明帝

三五明月滿四七靈宿繁清夜美行游置酒西園華  
池濫輕波芙蓉一何鮮飛蓋拂流景隨風自潺湲主人  
延貴客竟席列豪賢絃歌徹中堂羽爵騰我前微音喟  
有和甘醪發芳顏樂哉殊復樂君豈不俱然

子建



流飈起飛棟群星集櫺軒月出芙蓉池清光滿西園侍  
者夜行觴綺縞一何繁玉顏可攬持顧眄屬所歡華鐙  
正徘徊步障隨風還絃歌蕩層臺激響拂潺湲公子多  
憂客從橫各成篇主人自和氏披褐將誰愆絕纓紛陸  
離墮釵復闌干取樂此一時嘉會良獨難

仲宣

浮雲撤重陰流焱四座來西臨栢陽山南望銅雀臺回  
首出中原曠然千里開公子大置酒絃管間行栢華鐙

吐清光飛蓋自徘徊古人一含情于今安在哉亂離常  
苦多歡極令我哀

孔璋

羈客心無娛閒居日悠悠駕言侍高會公子招我遊凱  
風飄拂鬱素暉蕩清流中庭煥綺樹芳蕤自沉浮登臺  
遠顧望高下見原疇肅肅山谷悲黯黯陰氣收篇章時  
間作羽觴不及投逍遙何以立功名為相求

偉長

高臺鬱嵯峨其下臨清池黃鵠比翼遊淫魚戲連漪微  
風起水裔朱華紛陸離綺羅既生色笑歌不自治旨酒  
但相屬羽觴隨波移人生寄一世歲月忽如馳豈忘誦  
君恩賤軀未可知

公幹

月出西掖垣雙闕鬱蒼蒼白石爛素波蘋藻聚金塘方  
舟轉清流飛蓋紛翱翔輕颺灑前庭明鐙皦中堂淥酒  
溢尊壘嘉穀充圓方公子多妙製藻思何縱橫高談自

寵珍濡翰安能詳嬰疾日沈痼簿領非所長願言貽令  
德儼俛不可忘

德璉

群士諧佳會置酒君子堂清言解饑渴四座生芬芳雲  
雨濯高翼沙石明夜光連篇命音響好合興文章三臺  
開藝苑愛客擅詞場伸眉就存慰千載以為常

元瑜

知已難再遇攬衣及良辰天衢飛高翼清流濯纖鱗搖

落易為感孰能愛此身恩義不潛暢舉座皆異人公子  
善養士中外常所親侍會此高堂羽觴何紛員翰墨風  
雨集興文若浮雲翩翩致足樂願言守明貞

效應璩百一詩

殽函命關谷涇渭達黃河終南既面列沃野開其阿帝  
王信佳麗天府鬱嵯峨銅雀鳴雲中員闕夾丹霞三秦  
盛西氣小戎乃遺歌揚馬翼炎光流風激頽波使臣典  
文字執憲臨羣邪春秋大校士與世陳四科祗役在末

位興言念皇家筐筴有璽書翩翩為國華

感懷 八首

寥寥高秋氣涼風激中庭明星一何的皓月復泠泠清  
夜使心悲幽人起屏營羅帷徐動搖丹鋌發寒榮短歌  
易慷慨伏枕通雞鳴伴侶稍稍單獨立非其情

其二

四海一流覽為樂遽何央經傳有因依大雅未淪亡知  
名自前代騁翰各專場微音可通靈新辭協宮商綺麗

漫星陳江河鬱縱橫豈不多苦心世士竟茫茫中原二  
三子春秋足翱翔離別致倉卒千載不相當

其三

明珠出大海豫章擢清雲宗臣開國功王佐難其羣公  
朝日舉士愚者甘不聞披褐玩明時騁翰流華芬分適  
中自諧知已俟其真磬折難為容彈冠各有人誰令君  
獨往跼蹐失要津

其四

明堂饗元祚稱歲朝京師侵晨宴鸞臺日夕宿蘭池  
翩佳公子三五相追隨十千平樂酒羽爵何參差長歌  
激清風顧眄生光輝秉我徑寸翰興文一如飛旁人徒  
嗷嗷匹侶當自知離別難預圖樂往自成悲仰觀素雪  
流俯見朱華披棄置安足陳亡沒無還期百年譬影響  
倏忽誰能持

其五

在我遊帝京馮寵私自竒當年值數子無復新相知中



原一顧眄凌厲有餘姿用身常苦拙此志安得施浮沉  
託大道四海一棲遲時俗溺鄙議長往不可追願言反  
初服白日且逶迤酒中念故人千載為等期

其六

鴻鵠不嘯侶鷺鳥難為儔雙美無常玩江漢故分流堅  
芳喻蘭石千載一綢繆佳言盈耳哉良時安可留在昔  
誇中原數子從我遊

其七

孤行苦難立耿介傷其躬世路有姿態悠悠安所終美  
服光照人言笑一何工抱鼓若籟籥磬折如轉蓬輕薄  
不可視妖蟲誰能窮車馬從狹邪棘生九衢中

其八

浮雲翳高城回飈生戰場金鼓使人悲旗幟亦飛揚千  
載一如此丘隴逖相望奈何轉蓬士翩翩常道傍

酬皇甫虞部

青陽一何麗冉冉西南馳言念庭中樹率已萎華滋昔

我同心友懽宴及良時攜手理清曲各謂無人知天衢  
多高足冠蓋自相隨所願不與俱朝親夕生疑含意戀  
明世皓首為君期諒茲久識察紅顏坐盛衰

寄許殿卿

西山匿冬日北風淒以繁念茲歲方晏徘徊白雲垣俛  
首事尺牘儋石聊自存悠悠塵中心夙昔非所論感彼  
碩人情獨歌矢弗諼庶此涉時艱遂用安丘園路傍磬  
折子高足策華軒咄咄金蘭客來當蹈斯言

賦得何仲默

仲默自天秀弱齡負遐矚十六遊京邑藝苑策高足揮  
毫坐華觀懷人理清曲歸來放情志日晏從所欲結好  
玩遺芳明德以相勗古道諒寡諧遂令傷局促

五子詩

五首

王元美

元美何翩翩夙昔秉靈異京洛多冠蓋操觚各自媚所  
遇無此物識曲聽其偽大雅久沈邈時清作者至俛仰

知音稀含茲未伸意但坐奮逸響側身向天地虛名喜  
誤人依依千載事浮雲相攬持白日一高視四顧命傳  
匹中懷誰可致凌厲子長氣文章此未墜

吳明卿

吳生蕩滌士明德復何早高舉凌風翮青雲漫浩浩良  
士冠帶會斗酒弄辭藻一彈中清商下里難為好知音  
率已稀隱几存吾道衆言紛盈庭膠漆各自保掩耳走  
淆亂褰裳度潢潦罵坐豈盡狂流俗令人老陸沈金馬

門懷袖諫書草白日有棄捐遊子悲不造

宗子相

婉婉維揚士早歲絕人識結撰有至思先民乃遺則時  
俗徒嗷嗷此物知者得鬱鬱獨徃心百折江河力披覩  
他自媚我意安所測念茲攜手驩榮名與令德浩蕩陰  
陽移吾道相終極語及千載事愀愀動顏色中懷誰可  
喻文章亦經國一為麟鳳言三歎加餐食

徐子與

徐生一何俊本自青雲姿十年住天目含意多素辭既  
聞風雅音三歎文在茲眄睠生榮名徙倚即前綏念為  
理清曲高言倡者誰躑躅流俗間攜手不相疑時髦滿  
要路各謂中心私世人豈同願吾道欲委蛇黃金買大  
藥朱顏庶可持物理率如此和光難獨窺

梁公實

梁生起南海負氣何倜儻北交中原士徘徊得吾黨高  
名豈宿著一朝奮鴻響時俗既淆濁振衣念獨往禮法

難為工局促向天壤王喬可等期服食理非枉引領還  
羅浮願言稅塵鞅俯視大河流逶迤浮雲上盛衰隨物  
化世情自鹵莽吾意當告誰黃金妬偃仰

二子詩 二首

盧次梗

盧耒起河朔本自千金子蕩滌諸生間銷骨於積毀世  
無臨邛令馬得心尚爾深文類繆恭罪罟中狙喜乃繫  
黎陽獄十年攻一技既出浮丘賦始知有株累三嘆不



同時帝曰付諸理寥寥相如後誰能識察此

謝茂秦

謝榛吾黨彥輒軻京華陌黃金自不留朱顏亦已擲韋  
布豈盡愚咄嗟名士籍握手金閨人中情多所適冠蓋  
羅長衢染翰日相索遂令清廟音乃在褐衣客一出遊  
燕篇流俗忽復易還顧望鹿門矯矯青雲翺

酬元美 二首

妾本秦宮女少小揚蛾眉早辱君王寵朱顏驕自持卷

衣皆羅紈明珠縱橫垂頭上翠琅玕爵釵珊瑚枝盛年  
處深殿容華天下知一朝在里巷遂為生別離此身託  
古歡南山猶可移東鄰蕩子婦泥沙委路岐中心指秋  
日同穴乃所期

其二

有鳥名黃鵠乃在琪樹柯下來太液飲啜喋荇與荷周  
游視中土少年多羅家金衣菊為裳不受矰繳加一舉  
絕四海離哉天可摩毛羽未摧頽鼎俎奈爾何

再答元美 二首

盈盈猗蘭花深谷何逶迤秋風凋奇樹墮穉穉含  
英即蔓草不復揚華滋豈無王者香結根非其宜孤生  
感霜雪采折中心知幸君置懷袖慰此長相思亭亭西  
山栢自茂凌寒姿下流難久居壯士多所悲

其二

采苓首陽巔青蠅止于棘結髮奉歡宴栢舟矢靡慝上  
堂理琴瑟上堂視蠶織昵若形與影在遠復相憶豈不

防未然萋菲成罔極愛深生百憂棄捐衢路側賤妾抱  
區區中道蒙察識琴瑟聽其真蠶織五文色非君膠漆  
心羣小志亦得

郡齋同元美賦

遊子苦行役驅車自溟渤依依平生親斗酒日云沒秋  
風亦已厲蕭條衆芳歇何以贈君子徙倚攬明月燕婉  
當及時霜雪變華髮高足蔽天衢浮雲望雙闕令德一  
見疑積毀能銷骨中懷不復喻邈若胡與越綢繆有故

人知音無倉卒常恐遠別離含意向明發

送元美 二首

有鳳銜靈文栖栖北海湄臨流理毛羽五采以自奇飛  
如攜羣星擊若朝霞披翱翔千仞岡亦集梧桐枝一鳴  
叶清廟再鳴中咸池淒風振大野青雲顧我悲世無伶  
倫耳誰為度參差回首顧丹穴摧藏不可持將止帝東  
園忍令鷦鷯知阿閤在萬里哀號乃見疑啁啾榆枋間  
燕雀相追隨清光蔽白日何當復來儀

其二

夙昔二三子慷慨揚奇聲文章凌先秦詞賦無西京零  
落如流星各懷饑渴情念爾策高足北海日以清顧盼  
當中原冠蓋徒縱橫明發詠蓼莪依依戀所生悲風薊  
門來涕泣霑我纓解帶謝時人驅車薄姑城千里見大  
河躑躑浮雲征罷酒不能別蕭蕭駟馬鳴骨肉非一身  
意氣乃合并景光老自愛率已識榮名

答寄俞仲蔚二首

太乙貺漢德名駒生渥洼赤汗霑青雲長嘶振流沙饑  
齧玉山芻渴則飲其涯翹尾以躑躅駒駉相經過不願  
游閭闔况乃服鹽車世豈無伯樂垂耳奈我何天子發  
素書使者出蹉跎駉駉十二閑駕馬常苦多雖有千里  
姿羈絆非所加

其二

鬱鬱龍門山下臨千仞谿孤桐生其間幹與浮雲齊湍  
水擊其隈迴波蕩其涯野火燭其東飛雪塗其西莫則

止黃鵠朝則啼鵠雞悲風從天來清商以淒淒伯牙不  
能去傾耳中自諧匠石空扼腕運斤路何階琴瑟和神  
人無乃非其懷結根既已異雨露難獨垂願言俯大壑  
徃就長離棲

送李明府入秦

西北夏雲列飛蓋亦相望供帳被城隅父老皆扶將天  
子秉百度作新大明堂棖桷曼且碩掄才自南鄉山河  
俯壯麗肅穆垂衣裳是時薰風至五月開未央既奏解



愠曲或和斯干章聖顏慰飢渴帝心簡四方冢宰上績  
書召見伏明光用等課高第視事稱維良小臣奉威靈  
不得施其長誰謂一邑輕治行乃無疆願言備侍從珥  
筆述陶唐策勲諒有期遺愛匪可忘

許殿卿郭子坤見枉林園 二首

明時再嬰疾隕官此悠悠永言命沮溺二子乃從游田  
家何所有樽酒結綢繆散髮坐園中轆轤牽寒流擊我  
青門瓜聊且克庶羞雨氣蕩暄濁披襟御南樓開軒納

山色餘映一以收雲霞羅四隅烟火蔽林丘伏陰秀禾  
黍餉婦媚田疇西望華陽宮若見清河舟登臨信亦美  
曠然銷人愁願君愛景光多暇還相求

其二

佳客即良夜此會安可期結髮為兄弟晤言今在茲層  
臺挺浮雲河漢宛其垂積陰濯列宿三五正參差前山  
殿影亂雨勢坐已移皎月出平陵徘徊當照誰清光澄  
暑氣颯若撤長帷潦水明樹間流飈澹華棖零露響空

林蟪蛄以鳴悲世路良獨難  
斗酒多所宜達人忌榮名  
千載同一時

杪秋同右史南山眺望

南山有幽意駕言此徘徊  
湖波蕩寒城四座清光開  
金天澄素景秋氣何悲哉  
繁陰遞白日浮雲間往來  
落木颯中林流飈激巖隈  
朝昏上烟火原隰被樓臺  
故鄉無滯淫世路多塵埃  
念我平生歡離思壯難裁

九日集殿卿池亭分賦

二首

卜幽命詞客冠蓋至如縻白雲澹蕭晨黃花媚新醞灑  
翰湖山清開樽魚鳥近零露偃池荷淒風攜籬槿徑回  
片橋出林暝寒城隱臨流濯長纓飄然祛塵坌

其二

寒空鵲嶺秀霽野湖水濶墟落散城隅池亭入幽豁雲  
陰出水鮮石色含霜活白鳥下烟際歸鴻起天末返照  
歎長林羣流亂相聒紫蟹壯可持濁醪美堪掇秋高吹  
臺興老劇文園渴佳節有獨醒吾生豈云達

集張使君別業

清河迅寒流金輿杳空翠  
秋氣下高原蒼然西北至  
返照散疎林蕭條烟景異  
零落復佳期茅茨况幽致  
握手平生人笑談出往事  
舊游數子盡風流吾黨備  
千金抵白髮一醉滿君意

秋夜白雪樓同許右史襲茂才分韻

二首

林烟既曳綃湖霞亦披絳  
雞犬靜荒村蓬蒿翳深巷  
燒微見月出鐘清識霜降  
各稱浮白樂未覺呼盧戇  
更賦

梁園雪如流華渚虹預愁還城邑車馬紛相撞

其二

返照入平陵白雲出西隴天清雁影澹山空嵐氣重三  
徑何蕭條高人乃接踵諸生稷下秀詞客梁園寵松菊  
有佳色琴樽亦慇懃但醉不須眠寒燈坐相擁

送許史得弟字

秋風一蕭條白雲自相綴翩翩爾曳裾慘慘吾分袂鼓  
楫大河流揚帆下衡衡平臺壯登眺鄒枚儼兄弟既出

兔園篇頗兼子虛製詞賦有知遇王門即恩惠

集開元寺

流陰拂層岑返照翳深谷古寺入蕭條迴巖抱幽獨梵  
影淨香臺鐘聲殷石屋絕壁棲禪誦懸厓下樵牧秋花  
雨還瘦老樹霜逾禿寒泉可瑩心白雲况極目登臨客  
自佳搖落時何速蔬色蕩腥羶苔光清簡牘新詩發神  
秀舊游耿初服歸來杖屨便老去烟霞伏高城出睥睨  
燈火通林麓言旋轉多興後期此同宿

答張秀才問疾

青陽蕩積晦素雪亦云熙仲月陶嘉樹閒庭暖流滋微  
風中夜興清光動遙惟殘燈出四壁鐘鼓一何癡閉關  
抵百役內熱耿于罹養病終年歲人生能幾時服散代  
晨餐七箸厭相持哲夫秉大觀一往不復疑所愧乏明  
德盈縮無常期

寄題離薺園二首

芙蓉媚昭質初服一何好繁霜日夜零悲風起中道鵲



鳩既已鳴所遇無芳草馳騫終年歲紅顏足用老美人  
怨遲暮迴車自不早蕪穢沫榮名同心以相保

其二

蘭生有幽性零露峻其姿含芳在空谷清風來御之孤  
根亦何傷衆草故難為萎絕同糞壤中情君豈知願言  
置懷袖延佇及良時荃茅一以化奈此萊與施

贈元美兄弟

唯帝饗金石拊髀封疆臣二子越枕戈避讐棲海濱及

時列冤狀含意遂俱申乃望漁陽戍北風飄沙塵若見  
姑蔑旗陰雨施威神吳門有丘隴舊與要離隣陳尸赫  
中寢國命委荆榛楚王黜費氏棠君紀人倫何如上公  
服寵光祿所親願無廢前勞報恩致其身

虎跑寺泉

大士始結構鑿空偏此丘二虎自南嶽掉尾從師遊神  
威攖地脉佛力驅陽侯枯火迸石罅松根解綢繆勢寧  
決蹠去揮錫怒不休至今噴巖壑水猶咆哮流酌言生

壯心一嘯風颭颭海眼在其下潮汐故可求不然胡僧  
呪爭使波瀾浮穿壁吐長澗夾寺瀦龍湫疑作故山雨  
片雲駐岫嵒歸應出東林無為惠遠留

求志園

吳門有奇士二弟偕好修鞍馬照紅顏往來長者游帶  
劍何良綺垂纓亦綢繆豈不攬豪賢我志非所求駕言  
旋北郭灌園依一丘白雲蕩虛壑餘映翻寒流置酒臨  
高臺邈焉懷其儔鴻鵠既云舉千里常悠悠清風動帷

幕皎月光沉浮讀書見古人鳴琴調逾幽無取廣川觀  
昔在漢陰叟天子御飛軒龍蠓時乃瘳回首望中原壯  
心未可收

子與至武林

良時能自至嘉會無常期長飈吹浮雲奄忽東南馳依  
依曳景光泠泠發餘悲非君命儔匹游子安可為大江  
折其流武林愴以推念今在往路執手野徘徊何必同  
一身中懷貴不疑彈冠有逸響駕言即前綏

古意寄德甫 三首

悠悠我行役往路殊未央  
春華不須更奄忽踐嚴霜  
安知疑與喻風波起褰裳  
浮雲邈無所游子依故鄉  
長當遠別離何必復彷徨  
鴛鴦自踟躕黃鵠已翱翔

其二

嘉會在俛仰良時不可留  
悲風自遠至大江以悠悠  
中懷有白璧千載為一投  
飛龍雙欲乖胡馬群相求  
徘徊視四海含意各未酬  
念此平生親從彼浮雲游

其三

明月照我牀清風感重闌遺書發懷袖彷彿見容輝古  
歡匪自今游子當何依千秋一高唱豈獨知音稀莫言  
苦行役極宴不如歸努力兩黃鸝為爾故鄉飛

贈德甫


一首

豫章生庭中結根西山隈江流一蕩滴悲風千里來絲  
蘿謝依託冰雪抱崔嵬非不曼且碩時無栢梁災截為  
玉女瑟絕勝龍門材展我清商曲彈作臨高臺洪厓頷

願坐五鳳鬱徘徊

灌甫東陂宴

王孫古城隅東陂託偃仰回薄始翦雜高臺忽峻敞風  
波一以交淪漪恣遐放列雉翳中流返照幕魚網曲磴  
盤層陰清房殷清響並逸金谷韻兼詣濮陽賞恢台戒  
隆曦披髮命吾黨美酒滌滌煩囂冷言發神爽至今河朔  
人垂聲得侔儻直置病游梁為心任獨往



滄溟集卷四



欽定四庫全書

集部

滄溟集卷五

六

詳校官庶吉士<sub>臣</sub>柳邁祖

中書<sub>臣</sub>劉源溥覆勘

覆校官中書<sub>臣</sub>朱鈴

校對官庶吉士<sub>臣</sub>嚴福

謄錄監生<sub>臣</sub>劉文耀

謄錄監生<sub>臣</sub>劉耀馥

欽定四庫全書

滄溟集卷五

明 李攀龍 撰

七言古詩

送靳潁州子魯

華陽館前桑葉飛，荆軻臺上送將歸。  
為言擊筑悲歌者，當時酒人今是非。  
太守褰帷薊北來，燕山忽斷楚天開。  
郡中曉月雩婁出，霧裡秋濤桐柏迴。  
黃金璽書發明光，東走潁州西豫章。  
君家兄弟二千石，承恩不數尚書郎。

朱轡雙出領專城五馬踟蹰五馬行漢主乘春徵計吏  
小馮何讓大馮名

送新喻李明府伯承

爾昔紅顏客薊門獻書不報哀王孫一朝致身青雲裏  
座上還開北海樽余亦題詩郭隗臺燕山秋色對銜杯  
論交共惜黃金盡此處空悲駿馬來可憐郢曲今亡久  
下里之歌吾何有文章稍近五千言雅頌以還十九首  
才子新傳白雪篇江城忽借使君賢那堪西署為郎者

多病離居卧日邊

贈張子含茂才

憶昔中丞全盛時少年裘馬相追隨  
忽逢世變夙心違  
逆旅荒涼舊識稀  
古來萬事皆如此  
何用空悲昨是非  
流水無情白日速  
紅顏猶在黃金微  
飲君莫辭燕市酒  
欲行不行且攜手  
青雲今有故人存  
好贈綈袍哀王孫

刁斗篇

陰山戰合胡天黑  
漢兵大呼單于北  
邊秋日落五原  
屯

磧火夜連千竈食驃騎橫戈拂鐵衣悲風黃草白榆飛  
渡河鳥陣旌旗伏卧壁龍沙鼓角希征人馬上援枯骨  
滿地清霜刁斗發朔氣遙傳瀚海雲寒聲亂動輪臺月  
掩笳驕鸛聽垂泣按劍材官怒指髮宮女琵琶咽逝波  
使臣旄節凋幽窟誰能絕漠靖邊氛哀響如今不可聞  
六郡少年思轉鬪擬金猶憶李將軍

送張子參募兵真定諸郡

薊門昔在烽塵中匈奴火照西山紅  
蘊廬相望赤縣隘

梟騎未厭神畿空君王拊髀過郎署侍臣扼腕談邊功  
每飯不忘鉅鹿戰千金先發華陽宮邯鄲少年游俠子  
腰間匕首懸秋水出身願屬羽林兒橫行誓奪單于壘  
騰裝夜別縱博場貫酒朝辭挾瑟伎馬上風雲八陣成  
帳前鼓角三軍起故人新貴寵軒墀亂後高名衆始知  
國士漸看投筆至主恩況許請纓為天寒恒嶽倚長劍  
雪滿滹沱擁大旗歸來漢苑生春草見爾論兵散幕遲

齊俠行

簡書八道發明光詔徙羣豪赴朔方神武臨軒眈虎視  
將軍秉鉞鬱鷹揚山東十二諸侯國海濱五百義士鄉  
厭亂齊臣思定伯殷憂漢使出勤王敵驕擬縱田單火  
客憤能飛騶衍霜馭騎人人白羽箭民兵處處綠沈槍  
九河寒色旌旗動岱嶽秋陰鼓角長各倚少年輕燕頤  
曾經遣戍守漁陽一匡九合豈受賜排難解紛不可當  
往歲潢池先陷陣三時大戰銀冶場功名未致有莊賈  
肝膽欲傾無孟嘗天子只今顧西北男兒俠骨埋邊疆

賦得金谷園障子

誰將金谷傳毫素座上無人不回顧乍展旋驚澗水流  
纔開已識河陽路四壁真看片錦圍中庭如見雙鬟度  
移席休臨墜妓樓解衣欲掛沙棠樹彷彿明妃出塞吟  
聽來未必梁塵誤詩成酌我我豈辭便過三斗無論數  
綠珠安在恰當壚似留且往勢可呼意慘崑崙紫窳窳  
色寒滄海紅珊瑚君家富貴合如此此時那知有障子  
縱然客散掩空堂猶聞夜夜春風起



送申職方謫萊州推官

嫖姚三疏奏明光九月王師掃大荒不求十萬羽林騎  
從軍但請尚書郎看君未是侯門客草檄論兵一當百  
片言不合徑拂衣坐使元戎氣蕭索漢主臨軒送逐臣  
褰帷海上及行春正逢匹婦銜冤雨一灑浮塵不污人  
遊燕曾携短匕首袖裏虹蜺今在否出關若見棄繻生  
為余持贈單于走

送趙貞外行邊

狐白之裘紫騮馬鳴鞭東走漁陽野自言天子授長纓  
明光殿前三使者飛檄遠度桃花山昨日遼西校戰還  
吹律春風回黍谷揚旌暮雪灑榆關關門一望烟塵色  
抵掌志馳伊吾北豈獨秦人重統朝誓令羌虜避充國  
此行不按督亢圖欲畫地形取匈奴指揮千障鐵如意  
出入雙韃金僕姑驃騎將軍綠沈甲鸚鵡大夫黃石法  
磧裏兵屯種玉田雲邊燧起彈琴峽元戎幕府贈吳鉤  
太守離歌岐麥秋看君歸奏稱上意何足道哉萬戶侯

賦得狼居胥山送李侍御

材官十萬絕大幕踰河一戰胡兒却夜縱翼兵龍章渠  
繫以往封狼居胥姑衍山頭列旗鼓中壇擁纛陳首虜  
帳前面縛三當戶驃騎將軍醉歌舞北風千里雲摧頽  
瀚海波濤蹴日迴漢家天子雄才哉捷書親發栢梁臺  
君持繡斧五原郡牧馬單于不敢問黃沙白草寒冥冥  
今年為王犁二庭

送徐汝思郎中入蜀

岷江東流何渺茫仙舟西去指華陽峽深當晝暗雷雨  
白帝青天豁大荒一望峩眉山上月風吹寒影墮瀟湘  
益州部裏占星使草色春時接夜郎客將河漢支機石  
歸自乘槎歷七襄長弘碧血埋難化杜宇啼魂怨未忘  
胡不為我排閭闔願君致之北斗傍即今叱馭九折坂  
金精元氣參翱翔雪峰突兀三飛梁中掛鳥道通蠻方  
司馬長卿子虛賦其文可以陵太蒼臨邛小監楊得意  
亟薦詞臣謁建章後來此事益寂寞烟塵萬里遙相望

葉舍人

舍人家世稱儒素供奉班聯起居注仙郎盡識鳳凰毛  
父老相傳驄馬步當日蘭臺抗疏還讀書高卧柳亭山  
至今猶憶張文紀年少官微犯帝顏聞君夜入蓬萊直  
歸夢時時動秋色翰染金莖彩露寒廬開玉樹青天逼  
回首南雲春事繁浮丘峰下小桃源他時搖艇新安水  
坐把江花醉故園

送謝茂秦

孝宗以來多大雅布衣往往稱作者謝家玉樹操郢音  
其音彌高和彌寡寓梁曾曳王門裾遊燕欲薦中涓馬  
豈無冠蓋映當時滿眼悠悠世上兒文章千載一知己  
交結何須鍾子期此物有神兼有分富貴浮雲不與之  
盧楠坐銜越石恩醉後感激肝膽言蒼鷹睚眦鸚鵡賦  
身挂羅網何由翻殷憂楚奏秦庭哭遂雪黎陽國士冤  
歸去東將釣滄海安能貧賤常丘樊早借江鴻報消息  
或卧春雲且故園

送太醫令周一之從大將軍出塞

武皇按劍明光宮，夜發材官六郡雄。  
臨軒親遣上將軍，誓掃匈奴成大功。  
白羽九邊傳漢月，霜戈千里排胡空。  
轅門豈聞天子詔，帷幄寧多策士風。  
書記翩翩其選，志勒燕然。  
禪姑行業許原嘗，念已深情憂平勃。  
交仍淺藥囊，每擬提荆軻。  
驄馬何曾避桓典，淮陰惡少舊相輕。  
朔方健兒知姓名，身為揖客元戎府。  
意氣秋高，出塞行二百年來，無一戰。今日王師遂北征，便當滅虜始朝食。

不繫單于不解兵

南溪老樹行

老樹橫溪十畝陰下有跳浪三百頃酒罷捫蘿坐其上  
白眼青天何不逞牛斗之間見浮槎蒼茫宇宙成漂梗  
念我平生湖海客衣裳泠泠風馭冷文章八代俱望洋  
心事幾人同哀郢醉裡誰堪此陸沉俠來氣與千濤猛  
洛浦明珠舊寂寥渥洼神駿空馳騁翻然大叫觀者摧  
那知世路滄洲永投足還探河伯宮俯身欲拾中流影



驪龍蜿蜒垂霧雨虹霓繚繞含光景須臾力疲神亦眩  
乾坤低昂發深省最奇披髮泗水梁願言洗耳臨箕顓  
初看長駕出鼃鼃豈云吾道終蛙黷王郎驅石到渤海  
徐子招招迴舳艫此時共濟失狂瀾却悲胥溺情難整  
泥塗豈可困豪俊男兒相逢誇項領遂憶鳴鞭昨夜歸  
湘娥漢女猶延頸羣靈至今未敢散寒江颯颯開塵境

送公實還南海

梁生偃蹇誰與倫梁生偃蹇無與倫為郎十月不厭意

上書乞歸南海濱文章往往迂時好富貴安得嬰其身  
獨存肝膽論交者一一凌雲作賦人憶昨擊筑飲燕市  
酒酣以往氣益振黃金之臺空嶙峋華陽之館誰為薪  
駟駟騶耳俱良馬劍客博徒皆俊民梁生徐生情最親  
宗生王生詩更新經過但坐歌白雲罷曲彷徨若有神  
揮毫夜夜搖星辰襟期矯矯何能馴梁生此事成萬古  
欲別牽裳遂具陳羅浮之山何崔嵬下臨莽蒼波濤開  
維舟跋浪長鯨出倚杖垂天大鳥來北望中原寥廓哉

飛厓坐攬百粵色羣峰黝渺行風雷梁生之廬構烟霧  
千尋薜荔青摧頽有時高咏反招隱巖壑無人秋雨哀  
尉佗椎結本趙俠陸賈縱橫一漢才丈夫有道在龍馭  
還能與世相裛徊梁生何為終蒿萊梁生慎勿終蒿萊

擊鹿行

并序

余往與王生過子與見伏鹿於庭戲相謂曰  
余將携徐夫人七首刺此鹿麋腊之也生豈  
不願為我犄角之哉又與王生過子與則子

與刺殺此鹿食王生既而宗生亦至相與批  
脯飲也亦大豪舉哉乃各賦擊鹿行壯之矣

徐卿意氣殊不偶買鹿百金求其牡華堂燕客忽自放  
醉把邯鄲鐵匕首須擬麟從帝數游未聞鹿觸匈奴走  
高材吾黨復誰過文章矯矯驅群醜失日難將四海求  
逐來定死諸公手毛灑旋疑霜雪寒角摧更見珊瑚朽  
王郎大呌捧銅盤接飲其血軟以酒顧我前呼歷下生  
與君相愛為君壽舊時疾足今能否安得新詩滿人口

須臾碧眼胡兒至落碁脯腊無不有下箸已畏翠釜空  
織羹更出青閨婦衆者机上肉如陵覆蕉尚在隍中守  
嗟乎曲士夢何久徐卿獨醒可與友

送元美

王生二十趨明光是時作者不可當世上之名他自誤  
須君千載垂文章夙昔陸沉秋憲府風塵慘淡尚書郎  
心知此物難再遇片語論交燕市傍携手七陵朔漠色  
悲風九月吹白楊居然宇宙見雄俊睥睨今古神飛揚

流俗紛紛失肝膽那能結客聲利場近日操觚滿京洛  
江河決注非其長家握靈珠戶和璧及逢周客皆深藏  
高才梗楠與杞梓吾道麒麟或鳳凰清廟遺音壯昭代  
天庭火藻懸衣裳生也經綸斯濫觴混塵安取金躍冶  
養銳更羞錐處囊伊周屈宋儻易地鈞衡藝苑俱稱良  
生也為情誠彷徨但願右挹擊筑之荊卿左拍接輿之  
楚狂二豪侍側乃螺贏四子講德如蜩蟬舉觴白眼天  
茫茫秋風胡為歸故鄉亦欲送生從此去留生不住悲

河梁彩虹千尺挂碣石贈生千里為帆檣

楊山人四首

茗溪之水何泠泠吳山一峰天目青千林萬壑子雲亭  
從他世人還解事白頭不厭太玄經

其二

吳門市卒能逃名長安貴人非其情南山薄田春自耕  
盛世為農亦足老少年何用隨諸生

其三

千筐湖綿白雪開滿江稻色黃雲來山中客醉領其顏  
自言七十巖畊者帝於我有何力哉

其四

長裾不為王門賓千金散盡江湖人菰城一卧三十春  
省爾紅顏逐燕雀終然白髮行風塵

送子相

自作白雲郎未厭滄洲意偶然薄祿混風塵論交千里  
賢豪至元美翩翩多奇氣南越梁生亦雄視二子招携



從此逝爾今卧病緣何事綠鬢還鄉已壯遊錦帆十月  
下揚州移家好住昭明樓種瓜莫羨東陵侯文章萬古  
垂大業富貴浮雲非所求知君林壑百不憂圖書四壁  
高枕秋世人那識淮海士須行便為名山留丈夫義豈  
辱顏色使我摧眉去即休安能訾呶向權勢咄咄空令  
達者羞夙昔竟寥闊後來復決莽相看一別雨墜天他  
時神劍來精爽既言郊藪走麟鳳朝廷寧得無吾黨卿  
也抽簪且偃仰漁陽日影黯如鴈薊門雪花大於掌馬

上燕歌變徵聲壺中酒盡君當往

俠客行為子與贈吳生

本自吳越冶遊郎結交燕薊少年場長裾不曳朱門裡  
檣蒲大叫青樓旁被酒目攝羽林騎擁金作使邯鄲倡  
弟畜灌夫師事田光得意一言失意一言相怨一方相  
慕一方男兒過逢好驚座世事握齟寧陸梁姓名何惜  
借輕薄出處未須論侯王親知猶向隅有錢徒充囊錘  
家猶戴天有客徒滿堂猛虎可值俗子莫當平生片心

照秋水明日報恩還故鄉

留別子與

從君幾醉燕京酒舊遊花月回白首相看零落眼中人  
二子河梁重携手憶昨青山坐西署于今此事成不朽  
交態蕭條爾自諳浮名慘淡吾何有爭道賢豪擁上林  
華陽臺館盡黃金長卿詞賦徒壁立曼倩佯狂合陸沉  
平生得意向知己常將顏色當同心北望諸陵一拊髀  
悲風千里來寒陰春草如雲覆四野我行逶遲五其馬

十載為郎願已違出門况復悠悠者漢臣猶未老馮唐  
每飯豈忘鉅鹿下歲晚江湖夢獨遙秋深鴻雁書堪把  
題申職方五嶽圖

誰將五拳石錯落余之堂坐看素壁纏雲霧安得群峰  
掛屋梁更愁深林暝難入嵐影明滅侵衣裳左眄欲生  
滄海日右臨少昊凝清霜掃練白沙走朔漠回毫紫蓋  
垂炎荒須臾二室峻嶒出杳然置我烟霞傍不聞吹笙  
控飛鶴浮丘子晉俱冥茫良工拓筆天為開長風西逐

層陰來中庭無人數移席巔厓乍墮松杉摧眼前突兀  
太古色九州慘淡如浮埃宓犧神農未誕降元氣始判  
洪濛哉大江浩浩黃河流巨野相望懸莫秋異代猶探  
秦漢策真形或結金銀樓憑軒忽驚去千里青鞵竹杖  
胡在此復疑窈窕迷歸路何當稅駕聊徙倚捲簾逾添  
空翠寒張鐙更愛夕陽紫邢襄小吏困時名知君雅意  
憐泥滓

送永寧許使君

二首

邢州十月凋白楊城頭出雲垂太行把酒相看日欲墮  
五馬踟躕大道傍問君胡為萬里去小臣罪合投窮荒  
我聞西南羅施國風氣鬱塞殊陰陽長官椎髻見朝吏  
海蠻醉鼓橐中裝男兒貴至二千石何地不可稱龔黃  
壯遊須令百粵盡探竒更得浮沅湘永寧自惡無瘡癰  
明年雨露生還鄉

其二

使君落魄高陽徒結交李生仍狂夫醉後裂眚一相視

怒髮上指浮雲徂白日並堪出肝膽黃金誰為收泥塗  
長安少年太巧宦依倚權門何事無失策始就公府辟  
得意豈領蠻夷符爾今折腰揖下吏我更掩泣臨窮途  
奇數能令遇合變美才常被功名愚武溪毒淫須自愛  
九重沈深不可呼憶昔終軍繫南越鄉里小兒何其麤  
荒服盡霑大漢德單車入郡歌來蘇固知永寧之州纔  
如斗天子求賢三輔圖儻有徵書到遷客五馬好過秦  
羅敷

送王給事使潞

憶昔胡塵暗薊門六軍如雲集闕下天子授鉞臨軒檻  
宜陽王公其人者風流舊出城朔方簡在新除大司馬  
是時將帥實跋扈傾耳履聲入北斗引經答詔動稱意  
草檄提兵常在手帝力自堪制閭外股肱佐命吾何有  
一從誅亂朝廷清四海亦重尚書名看君少年青瑣客  
漢家今得韋玄成袖裏彈章百不避囊中諫疏垂欲行  
主恩三晉持節使上黨諸侯帶礪功泛槎春度濁漳水



設醴夜宴虎祁宮歸米煉石補造化論思庭諍才何雄

郡齋同元美賦

夙昔紅顏一大夫乘軺河朔何為乎除書歲下不得調  
鼓其刀筆寧壯圖帝恩初欲存折檻謂爾祝網從皇都  
相逢但飲邢州酒太守况即高陽徒庭前秋色正慘淡  
囊裡新詩復有無醉歌出塞雲中曲朔氣颯沓來飛狐  
路傍小臣久汨沒安得座上開江湖眼前大雅竟誰是  
作者如山道各殊更須一日論萬古揮毫振臂群雄呼

維時海內稱二子高名自喜王生俱白雪青天動蕭瑟  
臺郎郡吏同崎嶇楚璧照鄰不敢獻蛾眉在宮還自塗  
王生仰視浮雲徂矯手將我領下鬚與君周旋在今日  
還能百萬來長驅忽然神氣回莽蒼孤城搖落相踟躕

跳梁行寄慰明卿

武昌季子吳國倫左遷三載匡廬春紅顏便着青雲色  
白眼豈是功名人邢州太守昔入計猶自金閨侍從臣  
顧問片言搖日月彈章一字動星辰雖然舊屬平津吏

常苦跳梁不可致調笑縱橫倒四筵交驩往往非其意  
世間那得郢中歌君但論詩吾且睡何須更比謝生肩  
但應獨把王郎臂蕭條頗似東方生南康郡裡憶承明  
文彩縱然傾漢主恢諧難以取公卿畫眉石鏡二女倮  
濯足長江九派清此兒尋常未易識偷桃賣藥行妖精  
近來猶尚憑陵否俯仰浮沉無不有朝讀司空城旦書  
夜沽茂宰柴桑酒成敗寧關達士心卷舒終在朝廷手  
隨他肉食作雄飛饒我褐衣稱下走黨禁重開祝網年

一時逐客寵光偏晚收已抱泥塗恨更謫如何不可憐  
事急誰能馳叩闕家貧未擬罷歸田再來地僻逾高枕  
就使荒涼給俸錢壯遊萬里君須見青瑣鳳池元不賤  
使氣能令魑魅藏出身曾厭欃槍變楚狂豈止接輿賢  
秦孽猶堪背城戰回首畏途真自知一官不絕纔如綫  
難將此物鬪翱翔妬口含沙未可當四海弟兄堪並起  
中原我輩正相望總看棄置風塵裏不作踟躕道路傍  
鼓枻更逢漁父笑豈應憔悴老滄浪

此兒行重寄明卿

我聞南康大如斗明卿佐理常什九昨日中丞抗疏薦  
賢聲輒滿朝廷口豫章計吏入圖事愛君未敢援以手  
小臣憐才上白狀相公良久疾其首量移亦已從浩蕩  
不然徑逐此兒走誰知片言觸忌諱畢竟功名成掣肘  
丈夫失意分自當窮來傍人人避藏苦我折腰骨太勁  
看他伏謁項能強縱令慢世無不可似爾干時豈所長  
莫作拂衣少年態宦遊須使及春陽大舒楚歌小舒舞

是處江山好斷腸王郎至今棲北海帳前萬騎綠沈槍  
拂衣行答元美

五原驅車興殊淺三秦卧病秋雲高東帶那能見長吏  
談經何以隨兒曹上書一日報明主願乞骸骨歸蓬蒿  
小臣采薪業不佞聞道巢由亦已逃拂衣中原風雨來  
羣公祖帳青門開二疏一去三千載大夫未老寧賢哉  
新鄉城西重回首當時叱馭其人走路傍伏謁莫敢動  
囊裡俸錢君但取此輩交情雖可見吾徒大名終在口

予今偃息南山陲閉戶不令二仲知負海少年大跋扈  
遣使問我抽簪期百爾不分一狂客余髮種種何能為  
玄經半卷常自誦濁酒千鍾醉不疑五子江湖正漂泊  
黃鵠摩天慕者誰

答許右史

二首

黃鬚芄芄田舍翁傾身坐向錢孔中長頗便便美少年  
行步顧影私自憐誰知腐鼠能為祟縱是神仙有播遷  
使君似識浮雲意蹉跎實為功名利已拚酒隱富貴世

潦倒佯狂百無忌濁醪恰供十日飲酣法須與當時異  
五斗乍可調燥吻飛觴二子雄相視醉殺不作傲杯人  
邇來那得獨醒事魏文大白滿如月曾託屬車稱國器  
若言此物非其任爾家破瓢亦應棄

其二

王門隱者身坎壈老曳長裾裾婀娜自言能料一生事  
及至干時計常左從它慘淡復為誰即得新詩題向我  
雨雪蓬蒿共三逕春色偶伶餘藥裹濁醪但熟貧亦足



微官纔罷病輒妥胸中塼塊故須澆乘興往往無不可  
白眼生成薄祿相青山合就漁樵夥趙壹疾邪衆所擯  
鄒陽暗投才應坐羨爾悠悠世上情回頭數子殊么麼

送萊蕪蕭簿

蕭生業本儒術起稍因讀法得其指栖息十年白鹿洞  
擔囊一卷青烏子岱宗雄蟠大海濱衣冠氣王中有人  
我家松楸三千樹鞍山東望華不注為說千時常轆軻  
獨憐明主能知遇萊蕪作簿更誰群但恨無過范史雲

釜裡蠹魚堪自見鞭下蟲蛆詎忍聞看君才豈催科拙  
請謁公門非所屑藩臣答詔誤承恩翻然遂就遷官列  
匹馬悠悠復路岐即今失意欲何之同鄉冢宰諳名姓  
府掾郎曹佇可期

歲杪放歌

終年著書一字無中歲學道仍狂夫勸君高枕且自愛  
勸君濁醪且自沽何人不說宦遊樂如君棄官復不惡  
何處不說有炎涼如君杜門復不妨縱然踈拙非時調

便是悠悠亦所長

贈殿卿

前年賜環承主恩去年解裾辭王門身經畏途色不動  
心知世事口不論自顧平生為人淺羨君逃名我不免  
自憐垂老尚憑陵羨君混俗我不能有酒便呼桃葉妓  
得錢即飯蓮花僧

金吾行贈戴將軍

先皇諸將何其雄君家大人國士風賜錢留起嫖姚第

詔宴數入蘭臺宮五雲忽變石城氣七校親隨萬乘東  
當年帶礪山河在四海車書日月通侍從敢聞潛邸事  
朝廷竟錄代來功此時十歲羽林孤躍馬能彎兩石弧  
漢主臨軒求故劔承恩一拜執金吾生成燕頤寧辭武  
得奉龍顏不羨儒三提鹵簿陪陵寢再護樓船下郢都  
禁中自失張安世天上還看周亞夫

逼除過右史水村江山人同賦

夜來北渚北風急打頭雪花大如笠片紙東飛右史書

詰朝小作湖中集到門白鳥出高巢繫馬南山迸人入  
使君亭午未解醒肅客登筵一長揖地僻兼無俗子妨  
樽空况有鄰家給意氣還須我輩看功名但任兒曹立  
瞥眼旋驚青歲徂沾脣莫放金杯澀世上悠悠已自諳  
即今不飲嗟何及醉聽楚調起寒雲綵筆憑陵朱絲濕  
平生多少伯牙心此日因之寄篇什

賦得雁池送許右史游梁分奈字

漢家藩國稱冠帶雁池多暇為高會賓序同推枚叟尊

星潢共指梁王大賦成錦字映長流酒酣飛羽傳寒瀨  
藻翰常生授簡中潺湲不散鳴箏外清影朝含竹苑霜  
悲聲夜雜吹臺籟白首君恩豈稻粱朱門旅跡非蕭艾  
極知慕侶倦游人秋來肺病誰能奈

道逢郭子坤擁妾戲柬

城東桃花噴路光春風吹送孝廉郎自擁佳人馱細馬  
時臨綠水照紅妝羅裙已奪石榴色禿袖單衫杏子黃  
跣鐙微籠雙玉趾揚鞭笑起兩鴛鴦同棲孔雀言猶妬

並蒂芙蓉願始償為謝使君休借問郭家少婦身姓王  
二八盛年真擅寵只今三十尚專房持齋能苦頭陀行  
發誓曾燒頂廟香浩劫自知仙女分他生常在世尊傍  
每修好事辭書舍但有佳期入道場纔着霓裳顏更少  
但盤雲髻壻先狂假令不信吹簫侶試向秦臺看鳳凰  
和許長史箏伎篇

君不聞秦箏多慢聲平臺女兒新長成家本邯鄲行步  
好生年十三指爪清安得此雙絃索手那能獨酌高陽

酒正值傾囊無俸錢將來換馬還肯否自從解贈同心  
結不惜樽前香腕折幾回玉柱雁池飛春愁散作梁園  
雪合就羅敷陌上桑含顰一轉發中堂遙知華髮王門  
客縱是風流也斷腸

答寄殿卿見夢之作

憶昔紅顏日攜手一別三年非不久縱使天台記阮郎  
也應梁苑稱枚叟故人多病卧青春華髮如蓬自看醜  
漫爾風流更旁騷從他憔悴仍醉酒悠悠世上竟須疑



夢裡相逢知是否

和殿卿春日梁園卽事

梁園高會花開起直至落花猶未已  
春花着酒酒自美  
大人但飲醉即休纔到花前無白頭  
紅顏相勸若爲留  
春風何處不花開何處花開不看來  
看花何處好空回

答寄子威

劉生家本安東子不爾高名那如此  
十載論交少聞問  
君胡尺書數千里蒼頭大奴前置辭  
主人束髮重知己

家本闔閭城下兒清風獨為延陵起便從出刺三河還  
攬轡爭誇按百蠻早歲升公趨漢署只今謝客卧江關  
雖言萬事歸來好乍可論交到誰老猶作鳳凰池上看  
窮途殺更耽文藻中間跌蕩復王郎伏臘扁舟發太倉  
但語即翁常在口彼時多士儼成行宦情漸覺綈袍勝  
秋興翻隨綵筆強魏倩一珠纔照乘主人雙壁竟登場  
倡余和汝篇相及日居月諸業以集共道提戈虎穴迴  
儻容投謁龍門入開槭寒色散陽湖白雪樓空嶽影孤

不盡雄才推二妙止如古調已吾徒一當單于則豈敢  
相遇中原尚足圖但語主人須自愛一時長句似君無

酬李東昌寫寄白雪樓圖并序

樓在濟南郡東三十里許鮑城前望太麓西  
北眺華不注諸山大河清河交絡其下左瞰  
長白平陵之野海氣所際每一登臨鬱為勝  
觀東昌李使君子朱以讀白雪樓集於廣川  
馬中丞家咄然壯之歸為圖以寄而攀龍贈

焉如此

詩名東郡沈隱侯那復擅奇顧虎頭江湖槃薄有能事  
畫我山中白雪樓推毫已經海色至無乃兼驅蛟蜃遊  
須臾百里岱陰合咫尺疑聞清河流華不注山得非雨  
平陵以西胡獨秋松風似欲卷綃起良久看雲失去留  
丹青快意癡如此丘壑過人老即休使君實解郢中調  
為爾深知宋玉愁

送鄭生遊大梁詩序

鄭生者名文賢楚之雲夢人也少慕魏伯陽之術往往談長生自雲夢來關中三千里持一囊藥耳所至逆旅醫小兒即食其嫗醫老即食其子弟醫婦女即食其夫度三千里如在里巷中矣然不為糈也其來關中庶幾望見能為長生者焉余蓋苦多病三十年於此言醫也即未嘗見醫視脉如生者豈其診書異有它禁方邪生又自言醫且五十年於此

手指之附人脉多於握七箸咀咬如丘陵即  
未嘗不精神與病者通長桑君豈實視見垣  
一方人哉不察見脉而治病其礙豈啻垣一  
方關中故多賢豪人即如大中丞何公博物  
君子也亦言生矣余又言秦越人來長安遊  
時事生未嘗不輒苦其術而隱之不得屬余  
在告將歸生亦欲遊大梁則關中自大中丞  
許公大司徒劉公以下皆賦詩贈之而余序

其右方云

君不見黃鵠高飛未可羅榆枋之雀奈我何拂衣春色  
為黯淡故山高卧白雲多風塵誰識大梁行夷門輕薄  
笑侯生虛左莫言公子事今日邯鄲已罷兵金丹初出  
照人寒瑤草千年老鶻冠更欲清秋觀渤海那能渴病  
滯長安

代香山寺老僧答

老僧何處來迎客身無袈裟足無舄雖有弟子今流離

獨向空山種麻麥先時長者布黃金大師說法如來席  
浮圖中霄天樂下禪臺雨花坐盈尺共道當朝少遊幸  
唯此祇園有恩澤綵丈晴連鸚鵡林宮娥晚傍蟾蜍石  
侍從求看貝葉編焚香再拜開琳碧我往能言西域文  
珠函為取華嚴譯自復懸燈香爐峰君其問臘庭中栢  
何曾馬繞招提鳴未見沙門畜四兵突厥公然馳赤縣  
湖外秋風笳吹聲猶疑窮谷豈遽至已聞野哭尸縱橫  
累創被血竄榛棘問之不答慘且驚須臾馬馳蔽陵壑



三騎五騎擐長纓，桴弓北嶺飲南澗。驕氣直欲凌欖槍，  
一騎常驅百漢人。一人常聯二騎行，翻身仰射果毳落。  
束茅縱火燒朱甍，豈無卓錫答其背。佛力不祐人心傾，  
西堂北丘緣業惡。寺前荒冢遂崢嶸，亦是官軍入援急。  
匈奴颺去歸其營，匍匐漸從草莽出。晝伏夜走同狐鼯，  
衣鉢蕩盡微軀在性命。真如飛鳥輕丈人，豈願聞喪亂。  
神州豈宜有戰爭，故人更邀住廬嶽。萬垂垂衣右北平，  
燕中耆舊寄書說。早晚單于和議成，語罷空林轉蕭瑟。

茫茫天地終何情

滄溟集卷五